

籌辦夷務始末

同治朝
卷八十九之九十

347.911
50000

卷一百一十五
目錄

籌辦夷務始末卷之八十九

同治十二年癸酉正月丁亥署兩江總督龔樹聲奏鳳凰山各營始於同治三年上海洋兵會防之時李鶴章因戈登已夏禮所請量設三營教練操防以撤西兵外示羈縻內資控馭辦理具有深意迨留防日久營哨各官屢經更易流弊滋深如本年正護兩營藉端索賞後十一月初間臣訪聞正營弁勇復有紛紛求去之事雖無譁噪滋擾重情究屬不成事體卽經嚴飭提究並函商署撫臣恩錫會派記名總兵樊政陞馳往接帶確查逞刁弁勇分別重懲似此積習相沿若不設法更張恐貽後日之患惟事涉華

洋動多牽掣。從前曾國藩在兩江任內。曾經咨商總理衙門。有裁撤刪併之議。未及施行。茲擬詳查原案。密飭蘇松太道沈秉堃。先與英法各領事妥商。應如何簡閱裁併。或移紮他處。由臣相機酌度。俟辦有端倪。再行專案具奏。御批知道了。

已丑。署兩江總督張樹聲奏。據蘇松太道沈秉堃稟。同治十一年八月十二日。日本官鄭永甯來通。述及秘魯國瑪也西船。由澳門行抵日本橫濱海口。有華人自船投水。經英國兵船官員援仁彫救起。詢係被人拐賣。同船華民二百餘人。伊恐到秘魯受苦。是以投水。由駐日本之英國公

使知會經日本官將該船扣留。被拐之人盡收上岸。緣秘魯係無約之國。遂會同英美兩國領事訊辦。並函致鄭永甯。詢問中國官如何辦理。速寄回信等語。當經前署通商大臣何璟。以秘魯國係無約之國。乃私在中國澳門地方拐人出洋。既經日本國扣留保護。自應派員往辦。以答鄰好。而衛民生。當卽遴委補用同知候補知縣陳福勳。並由道商同上海英美兩領事。派美籍譯官麥嘉締。偕鄭永甯同搭輪船前往日本。相機妥辦。去後。嗣據沈秉成稟稱。陳福勳等於八月二十七日俱到橫濱。所有被拐華民已先由日本外務卿飭據神奈川縣權令大江卓。自七月初四

日起節次訊供。至八月二十四日定案。華人二百餘名。均俟中國派員帶回。其瑪也西船。從寬釋放。陳福勳當將華人趙亞好等二百餘名。全行查收。仍搭輪船從橫濱開行。日本外務卿復派領事官品川忠道沿途照料。於九月二十一日到滬。由道分飭上海印委各員。將該華民逐一查訊。籍隸廣東者一百九十六名。福建二十七名。湖南江西浙江各一名。除福建湖南等省。人數較少。酌給路費。分交員董覓便遣回。其籍隸廣東。而上海有親族可依。亦准保領外。尚存廣東人一百八十七名。當卽派委候選通判劉光康。候補直隸州黃國光。搭坐輪船。押送回粵。旋據廣州

府覆稱被拐難民如數收到。已分交各原籍州縣給屬領回。一面嚴拏拐匪懲辦等情。茲復據沈秉成以此案辦理完竣。稟請具奏前來。臣查此案歷辦情形。業經前署通商大臣何璟隨時咨報總理衙門查照。並密咨兩廣督撫臣轉飭地方官務將拐匪訪拏嚴辦在案。惟秘魯國船擅在澳門拐去華民至二百餘人之多。行抵日本橫濱地方。經該國官裁留訊辦。知會中國派員前往悉數帶回。實由日本及英美各官認真襄辦。俾該華民得慶生還。且該華民在日本留養多日。中國委員未經接管以前。一切用項悉係該國支應。疊經委員詢問數目。以便歸款。日本官均稱

已由本國支銷。不須送還。出力出資。極敦鄰誼。尤堪嘉尚。除飭道將英兵官美繙譯酌予獎勵。一面備辦綢緞等物。分送日本官員。仍由臣照會外務卿致謝。

御批該衙門知道

壬辰烏魯木齊都統景廉奏。據駐防古城統領孔才。金永清等呈稱。適有俄國商民帶領從人十六名。內有哈薩克十二名。馱載貨物來古貿易。隨帶清漢字俄字路照各一張。又由烏請領蒙古字路照一張。除清字俄字蒙古字路照無人認識外。所有漢字路照內開大俄國邊界官將軍姜得阿色斗阿客市客。為給發執照事。今有本國商民哈

利帶人二十五名。攜帶駱駝九十隻。雜貨一百六十五捆。大小槍七箇。刀五把。馱馬二十七匹。前往蒙古各處貿易。所有中國及蒙古地方各官員人等。查照放行。任便貿易。毋得攔阻。此照該商於回國之時。立即回繳。特此畫押蓋印。執照為憑。降生一千八百零九年月日。右給該商人執照等因。統領等親往查驗。伊等同行諸色人等。較原照計短人八名。詢其情由。據稱由烏折回。該俄商隨帶貨物五十五馱。駝七十八隻。馬三十七匹。羊四百三十八隻。當將該俄商逐名盤詰。據稱前來貿易。並無異詞。等語。當即飭該統領等。諭以古城逼近賊氛。時常打仗。且駐紮兵勇甚多。誠

恐照料不周。該俄商等設稍有損傷。貨物稍有遺失。轉非
兩國和好之道。不如卽早折回等語。妥為開導去後。旋據
孔才等稱。該俄商復稱往巴里坤貿易。可否准其前往。等
再行劄飭孔才等。仍遵前劄善言開導。俾令折回。查此次
俄商。是否卽係前次赴巴里坤貿易折回之令。繞道赴古
柳或另係一起。均未可知。刻下西疆軍務孔棘。俄人覬覦
烏城。前在三塘湖暫住之俄商。卽聞有圖繪山川形勢之
說。此次赴古俄商。難免非窺探軍情地勢。況巴里坤等處
時有賊氛滋擾。該俄商等馱載貨物。往來行走。稍有疏虞。
不免饒舌。惟俄人犷悍性成。難以語言相爭。且恃有通商

和約。又未便過於激切。轉使俄人有所藉口。事關中外交涉。攸繫綦重。可否請

旨飭下總理各國事務王大臣。轉諭住京俄使。俟西疆軍事少鬆。再令該俄商貿易。以弭釁端而鞏邊圉。

御批該衙門知道

戊戌總理各國事務恭親王等奏。同治十一年十二月二十三日。軍機處交出直隸總督李鴻章奏。日本使臣來津換約。請

欽派大臣。以便屆期商辦一摺。奉

旨該衙門議奏。單併發欽此。臣等伏查日本籲請通商一案。上年

欽奉

諭旨。派李鴻章為全權大臣。辦理日本通商條約事務。嗣經李鴻章與日本使臣將兩國修好條規通商章程會同議定。書押鈐印。一律完竣。該使臣復來京敬獻方物。均經直隸督臣李鴻章及臣等隨時奏明。上年四月。該國使臣柳原前光復至津門。商求酌改。又經李鴻章督同津海關道等再三辯駁。該使臣旋即回國。亦經直隸督臣李鴻章具奏在案。茲日本國既派使臣來津換約。自應援照各國換約成案。豫請

欽派大臣。查兩國條規章程。早經李鴻章與該國使臣商定。此次

該使臣照會詞意均極恭謹。將來屆期互換。自可順理成章。惟觀奉國書一節。誠如李鴻章所奏。須得密為籌議。應於換約時體察情形。妥慎酌辦。直隸督臣李鴻章係與日本使臣會議條約之員。現該國特派使臣來津換約。臣等擬請就近仍

派李鴻章與日本使臣將上年所立條約彼此互換。如蒙

俞允。卽由臣衙門將日本國合訂修好條規二本。照案咨送內閣。

恭用

御寶。發交李鴻章祇領。照辦。所有遵議請

旨派員與日本國換約緣由。謹繕摺具奏。

諭內閣。著派李鴻章將與日本國所立條約。妥為互換。

諭軍機大臣等。總理各國事務衙門奏。請派員辦理日本國換約事宜一摺。日本國通商條約。上年經李鴻章與該國使臣會同議定。茲該國派使臣來津換約。著派李鴻章將上年所立條約。妥為互換。其條規二本。卽由總理各國事務衙門。發交李鴻章。祇領照辦。其觀奉國書一節。著李鴻章於換約時。體察情形。妥慎酌辦。本日諭旨一道。一併發往。如該使索看憑據。著李鴻章另行恭錄。給與閱看。俟換約事畢。此旨仍繳還軍機處備查。

庚子。閩浙總督李鶴年。福建巡撫王凱泰奏。福建水師提

督李成謀。奉

旨調補長江水師提督。所遺提督篆。經臣李鶴年遴委福甯鎮總兵羅大春接署。惟李成謀前蒙

簡派統領輪船。現因調補長江。距閩較遠。勢難兼顧。咨請遴員接辦前來。查輪船統領責任甚重。必須大員經理。方足以壯聲威。現署提臣羅大春在閩年久。熟悉情形。以之接辦。可期勝任。臣等與總理船政前江西撫臣沈葆楨函商意見相同。可否卽令羅大春統領輪船。以專責成。伏候

聖裁。

諭軍機大臣等。李鶴年。王凱泰奏請飭署任提督統領輪船等語。提督李成謀現在調補長江水師提督。輪船事務勢難兼顧。李

鶴年等以署提督羅大春在閩年久熟悉情形擬令該員接統著卽照所請所有輪船統領應辦事宜卽責成該署提督經理務令隨時校閱俾臻嫻熟沈葆楨現已到工任事亦當隨時查察督飭認真妥辦毋稍懈弛

甲辰總理各國事務恭親王等奏上年十二月二十四日臣衙門接據美國使臣樓斐迪照會稱瑞威暨瑞威國君主查理在本國長逝所有瑞威暨瑞威國君主之位當為君主查理之弟阿士嘉登受隨於同治十一年八月十八日卽君主位其禮已成已由臣等給與美國使臣照覆謹隨摺具陳

御批知道了。

二月癸丑署伊犁將軍烏里雅蘇台參贊大臣榮全奏竊
於本年十一月初二日接准總理各國事務衙門來函
俄國博大臣到京與我王大臣面議與前在俄境所議之
詞略同欲交伊犁要我給一照會永保邊境無事。幾經辯
論擬仍照六月定議辦理並倭公使有俄國另派大臣來
議之說。令督仍查照前寄節略信函斟酌情形相機籌辦
並令督在塔聯絡民團訓練索倫等兵熟籌一切各等因
督當卽行文阿爾瑪圖俄官定期約地再為面議並詢以
是否另派使臣早為見覆以便接收伊城以敦素好等語